

समे .1815

Headlines

1. प्रधानमंत्री नरेन्द्र मोदी होरें आखेआ ऐ जे स्टार्ट अप इंडिया अभियान नै नोजवानें गी सशक्त बनाने दे कन्नो-कन्नी भारत गी तगड़ा ते भविक्ख लेई तैआर बी बनाया ऐ।
2. राजौरी जिले दे बडहाल ग्रां च 11एं बच्चे सनें कुल 15 लोकें दी रहस्यमयी मौतें दी जांच 11एं मैम्बरें आहली विशेष जांच टीम करोग।
3. रेलवे सुरक्षा कमिशनर होरें उधमपुर-श्रीनगर-बारामूला रेल लिंक परियोजना दे 17 किलोमीटर लम्मे कटड़ा-रियासी ट्रैक पर रेलगड्डियां चलाने दी इजाजत देई दित्ती ऐ।
4. उपमुख्यमंत्री सुरिंदर चौधरी होरें आखेआ ऐ जे रोजगार पैदा करने ते अर्थबवस्था गी मजबूत बनाने च मुकामी उद्योग बड़ी महत्वपूर्ण भूमिका निभांदे न।
- 5 दिल्ली ते कटड़ा बश्कार चलने आहली वंदे भारत एक्सप्रेस रेलगड्डी गी 50एं दिनें आस्तै रद्द करी दित्ता गेआ ऐ।

<><><><><><>

PM-Startup(byte)

सरकार दी मती तरजीह आहली पहल स्टार्टअप इंडिया गी अज्ज 9 ब'रें पूरे होई गे न। इस मौके पर प्रधानमंत्री नरेन्द्र मोदी होरें आखेआ ऐ जे सरकारै देसै च स्टार्टअप संस्कृति गी बढ़ावा देने आस्तै कोई कसर बाकी नेई छोड़ी ऐ। सोशल मीडियो पर इक पोस्ट राएं श्री मोदी होरें आखेआ ऐ जे पिछले 9 ब'रें दरान इस शानदार पैहलकदमी नै अनगिनत नौजवानें गी सशक्त बनाया ऐ ते उंदे नमें बचारें गी कामयाब स्टार्टअप्स च तब्दील कीता ऐ। प्रधानमंत्री होरें आखेआ जे सरकार दियां नीतियां बपार-कारोबार दे तौर-तरीकें गी सखल्ला बनाने पर केन्द्रित न। उनें आखेआ जे उंदी सरकार नमिएं काह्डें ते इनक्यूबेशन सरबंधी केन्द्रें गी बड़ी सक्रियता कन्नै बढ़ावा देआ करदी ऐ तां जे देसै दे नोजवानें अंदर जोखिम चुक्कने ते किश नमां करने दी प्रवृत्ति पेदा कीती जाई सकै। श्री मोदी होरें आखेआ जे स्टार्टअप इंडिया प्रोग्राम दी कामयाबी एह दर्शादी ऐ जे अज्ज साढ़ा मुख्य विश्वास कन्नै भरोचे दा ते भविक्ख लेई तैआर ऐ। श्री मोदी होरें हर इक नौजवान गी गुजारश कीती ऐ जे ओह अपना इक स्टार्टअप विकसित करै। उनें आखेआ ऐ.....

<><><><><><>

Rajouri Mysterious Deaths(byte)

सरकार राजौरी जिले दी बुद्धल तैहसील दे बडहाल ग्रां च होई दी रहस्यमयी मौतें दी जांच करै करदी ऐ जित्थें अजें तोड़ी 15 लोकें अपनी जान मुहाई दित्ती दी ऐ। आकाशवाणी जम्मू दे संवाददाता दी रिपोर्ट मूजब पुलसै पिच्छले इक म्हीने दरान त्रऊं परोआरें दे 11 बचवें समेत कुल 15 लोकें दी रहस्यमयी मोतें दी जांच लेई विशेष जांच टीम शनि एसआईटी खडेरी ऐ। एह्दी अगुवाई बुद्धल दे एसपी ओपरेशन होर करै करदे न ते उनेंगी ऐकड़ी संवेदनशील जांच गी जोड़ चाढ़ने दा जिम्मा सौंपेआ गेआ ऐ। राजौरी दे एसएसपी गौरव सिकरवार हुंदे हुक्मै पर एह् एसआईटी खडेरी गई ऐ। एह्दे अलावा फारेंसिक मैडिसीन ते बिसली चीजें सरबंधी टैक्सीकोलोजी, माइक्रोबायोलोजी, बच्चे सरबंधी माहिरें यानि पीडिएट्रिक्स ते बमारिएं दी वजह ते प्रभाव सरबंधी जांच आह्ले विभाग पैथोलोजी थमां माहिरें गी इस जांच दे कम्में च जोड़ेआ गेआ ऐ। एसआईटी गी एह् निर्देश दित्ता गेआ ऐ जे ओह् जांच सरबंधी ब्यौर, हफ्ते दे जिला पुलस दे प्रमुख होरें गी जमा करोआन। शुरूआती जांच च मारे गेदे लोकें दे नमूनें च जहरीले तत्वें यानि न्यूरो-टोक्सिन दे मजूद होने दी सारत थोई ऐ। उआं इंदी अजें अगड़ी जांच कीती जा करदी ऐ तां जे मौतें दी असल वजह दा पता लाया जाई सकै। तोआई इस बारे मीडिया कन्ने गल्ल करदे होई जम्मू कश्मीर दे मुख सचिव अटल डुल्लू होरें आखेआ जे पुलसै इस मामले च अपराधिक षड्यंत्र दी जांच लेई इक बशेष टीम खडेरी ऐ। उनें आखेआ.....

<><><><><><>

Katra Reasi Rail Track

रेलवे सुरक्षा कमीशनर दिनेश चंद देशवाल होरें उधमपुर श्रीनगर बारामुला रेल लिंक परियोजना दे नमें बनाए गेदे 17 किलोमीटर लम्मे कटरा रियासी रेलवे ट्रैक गी माल समेयान ढोने ते यात्रिएं दी आओजाई लेई खोलने दी मंजूरी देई दित्ती ऐ। आकाशवाणी दे जम्मू संवाददाता दी रिपोर्ट मूजब कटरा ते रियासी स्टेशन बंशकार माल समेयान दी ढुहाई ते यात्रिएं दी आओजाई शुरू करने लेई सैली झंडी दे बाद मेद ऐ जे तोले गै कश्मीर गी रेल राएं कनयाकुमारी कन्ने जोड़ने दा सुखना हकीकत बनी जाग।

<><><><><><>

ISRO Spadex

भारती अंतरिक्ष अनुसंधान संगठन-इसरो नै अपने स्पेडैक्स मिशन तैहत अंतरिक्ष यानें दी डॉकिंग दी प्रक्रिया अज्ज मुकम्मल करी लैती ऐ। राष्ट्रपति द्रौपदी मुर्मू ते प्रधानमंत्री नरेंद्र मोदी होरें एह्दे पर इसरो दे साइंसदानें ते कन्ने इसरो च कम्म करने आहले सभ्बनें सदस्यें गी उपग्रहें दे अंतरिक्ष च सुरक्षित डॉकिंग च कामयाबी लेई ममारकबाद दित्ती ऐ। राष्ट्रपति द्रौपदी मुर्मू होरें इस ऐतिहासिक कामयाबी पर इसरो दे वैज्ञानिकें दी सराहना करदे होई उनें'गी भविष्य लेई शुभकामनां दित्तियां न। सोशल मीडिया पर इक पोस्ट राहें राष्ट्रपति होरें आखेआ ऐ जे इस ऐतिहासिक उपलब्धि दे कन्ने, अंतरिक्ष डॉकिंग समर्थ दा कामयाबी कन्ने प्रदर्शन करने आह्ला भारत इस दुनिया दा चौथा मुख बनी गेआ ऐ। इस उपलब्धि दी सराहना करदे होई प्रधानमंत्री नरेन्द्र मोदी होरें इक सोशल मीडिया पोस्ट च आखेआ ऐ जे भारत दे भविष्य लेई अंतरिक्ष कार्यक्रमें च एह् उपलब्धि इक मील दा पत्थर साबत होग। तोआई, विज्ञान ते टेक्नॉलॉजी मंत्री डॉ. जतिंद्र सिंह होरें इस उपलब्धि पर खुशी प्रगट करदे होई आखेआ ऐ

जे स्हाड़े साइंसदानें ओह करी दस्सेआ ऐ जेह्दा कुसै नै सोचे दा बी नेई हा। उनें आखेआ जे अंतरिक्ष च उपग्रैहें दी डॉकिंग आह्ला एह पूरा सरिस्ता पूरी चाल्ली भारती ऐ जेह्दा अंतरिक्ष खेत्तर च भारत दिऐं नित नमिएं उपलब्धिऐं च इक महत्वपूर्ण थाहर रखदा ऐ। उनें आखेआ जे इस उपलब्धि नै स्हाड़े भविष्य दे अंतरिक्ष मिशनें जि'दे च भारती अंतरिक्ष स्टेशन, चंद्रयान-4 ते गगनयान बी शामिल न, लेई बवस्था ते रमानदारी आहले ढंगै सिर तोड़ चढ़ने दी बत्त पदरी करी दिती ऐ।

<><><><><><>

Snow fall Vaishnou Devi

कटरा च त्रिकुटा पहाड़िएं पर स्थित श्री माता वैष्णो देवी जी दे तीर्थस्थान पर अज्ज बर्फबारी होई। पवित्र स्थान सनें आले दोआले दिऐं पहाड़िएं पर बर्फबारी कारण उत्थें नजारा बड़ा मनभावना बनी गेआ जिस करी होर मते सैलानी इत्त बक्खी आकर्षित होआ करदे न। श्री माता वैष्णो देवी श्राइन बोर्ड नै श्रद्धालुऐं दी सुरक्षा ते सुविधा लेई सब्बै लोड़चदे बंदोबस्त जमीनी बनाए दे न। माता वैष्णो देवी जी दी यात्रा बवस्थित झंगै नै चले करदी ऐ ते बोर्ड दे अधिकारी मौसम दे सूरतेहाल पर नेड़मी तक्क रखा करदे न। बोर्ड नै श्रद्धालुऐं गी सलाह दिती ऐ जे ओह बड़ी मती ठंडु गी दिक्खदे होई गर्म टल्ले लान ते लोड़चदे दिशा-निर्देशें दी पालमा जकीनी बनान। मौसम दी स्थिति जानने ते यात्रा सरबंधी निर्देशें लेई श्रद्धालु श्राइन बोर्ड कन्नै राबता करी सकदे न।

<><><><><><>

Announcement (Must Carry)

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता लेई दरखास्तां मंगियां गेइयां न। इच्छुक आवेदक, जेह्दी उम्र 24 थवां 50एं ब'रें दे बश्कार ऐ, ते ओह कठुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च द'ऊं ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोड़चदे उपकरणें वगैरा दा इस्तेमाल बी करना औना चाईदा। आवेदक जिला सदर दफतर दी 10 किलोमीटर दी हद्द दे अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी, मेदवार गी क्षेत्रीय समाचार एकांश आकाशवाणी पंजतीर्थी जम्मू, पिन कोड 180001 पर 15 फरवरी 2025 थवां पैह्ले-पैह्ले आइयै दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Dy CM

उपमुख्यमंत्री सुरिन्द्र चौधरी होरें आखेआ ऐ जे मकामी उद्योग, रोजगार पैदा करने ते अर्थबवस्था गी मजबूत बनाने च बड़ी महत्वै आली भूमिका नभांदे न। उनें आखेआ ऐ जे मजूदा सरकार बक्ख—बक्ख पैहलकदमिएं ते उद्योग दे मुआफक योजनाएं दे राएं मकामी उद्योगें दा उचित विकास जकीनी बनाने लेई वचनबद्ध ऐ। उपमुख्यमंत्री होर अज्ज जम्मू दे शहीदी चौक च जम्मू कश्मीर इंडस्ट्रज दे शोरूम दे दौरे दरान ऐहलकारें कन्नै गल्लबात करै करदे हे। जेके इंडस्ट्रीज दे मैनेजिंग डरेक्टर विक्रम गुप्ता ते होर दुए बड्डे ऐहकारें बी इस मौके पर उत्थें मजूद हे।

<><><><><><>

Vande Bharat Cancelled(byte)

भारती रेलवे नै दिल्ली थमां री माता वैष्णो देवी कटरा तगर चलने आली इक वंदे भारत एक्सप्रेस रेल दी सेवाएं 50एं दिनें आस्तै रद्द कीती ऐ। ट्रे नंबर 22439—22440 जेहड़ी नमीं दिल्ली ते कटरा बश्कार चलदी ऐ ओ किश समें आस्तै रद्द कीती जा करदी ऐ। एह रेल उत्तरी रेलवे जोन राएं चलाई जंदी ऐ जेहड़ी रख—रखाव आले कम्म करी किश समें आस्तै बंद कीती गेदी ऐ। इस रेल च जेहड़ी सुआरियां सफर करने आलियां हियां, उनें गी इस दरान यात्रा दे दुए विकल्प चुनने दी सलाह दित्ती जा'रदी ऐ। इसलै 2 वंदे भारत एक्सप्रेस रेलों दिल्ली ते कटरा बश्कार चला'रदियां न। पैहली वंदे भारत 22439—22440 नमीं दिल्ली—श्री माता वैष्णो देवी कटरा ते दूई 22477—22478 श्री माता वैष्णो देवी कटरा—नमीं दिल्ली वंदे भारत एक्सप्रेस एं, इंदे च दूई निर्धारित कार्यक्रम दे मताबक गै चलदी रौहग। इस बारे गल्ल करदे होई कटरा रेलवे स्टेशन दे सुप्रिटेण्डेंट जुगल किशोर होरें आखेआ.....

<><><><><><>

PM Mann Ki Baat

प्रधानमंत्री नरेंद्र मोदी होर अपने माहवार रेडियो कार्यक्रम 'मन की बात' दे राएं इस बारी 19 जनवरी गी अपने विचार, देश—विदेश च रौहने आहले श्रोताएं कन्नै सांझे करडन। उ'आं ते एह प्रोग्राम म्हीने दे अखीरले ऐतवारें दिनै 11 बजे प्रसारित होंदा ऐ पर ऐकती खीरी ऐतवार 26 जनवरी होने करी, एहदा प्रसारण इक हफता पैहले कीता जा'रदा ऐ। एह इस कार्यक्रम दी 118मीं किश्त होग। इस कार्यक्रम च शामिल कराने लेई लोक अपने सुझास 17 जनवरी तगर भेजी सकदे न। श्रोता अपने सुझास टोल फ्री नंबर 1800—11—7800 पर जां फही नरेंद्र मोदी ऐप जां माई गोव ओपन फोरम पर बी भेजी सकदे न।

<><><><><><>

